

醫宗撮精卷二

古吳薛 已立齋 著

樵李黃承昊履素評輯

△腎虛火不歸經發熱等症

沈大尹不時發熱日飲冰水數碗寒藥二劑熱渴益甚形體日瘦尺脈洪大而數時或無力王太僕曰熱之不熱責其無火寒之不寒責其無水又云倏熱往來是無火也時作時止是無水也法當補腎用加減八味丸不月而愈

症屬無水當壯水之主以鎮陽光則宜服六
味地黄丸矣而何以服加減八味丸耶蓋此
方內有肉桂桂乃火類以火招火方引得歸
源耳

顧大有父年七十有九仲冬將出少妾入房致頭
痛發熱眩暈喘急痰涎壅盛小便頻數口乾引飲
遍舌生刺囊縮如荔枝然下唇黑烈面目俱赤煩
躁不寐或時喉間如烟火上衝急飲涼茶少解已
瀕於死脈洪大而無倫且有力捫其身烙手此腎

經虛火遊行於外投以十全大補加山茱澤瀉丹
皮山藥麥門五味附子一鍾熟寐良久脈症各減
三四再與八味丸服之諸症悉退後畏冷物而痊
顧仁成年六十有一痢後入房精滑自遺二日方
止又房勞感寒怒氣遂發寒熱右脇痛連心胸腹
痞自汗盜汗如雨四肢厥冷睡中驚悸或覺上升
如浮或覺下陷如墮遂致廢寢或用補藥二劑益
甚脈浮大洪數按之微細此屬無火虛熱急與十
全大補加山藥山茱丹皮附子一劑諸症頓愈此

等元氣百無一二

本草言寒因熱用熱因寒用又論心爲君火
可以直折相火爲龍火不可以水濕折之當
從其性而伏之故世間龍雷之火及火芥之
火見水則愈熾見火卽滅此至可異事而有
至理存焉真陽虛耗火不歸源以致相少妄
動變爲假熱諸症此必用桂附等劑引火歸
源而後治若見熱候而投以清涼必無幸矣
蓋好色者久則陰虛入房而驟病者多屬陽

虛不可不知卽陰虛之症亦宜以燥降收之
藥涼而斂之旋卽以甘溫之藥養之庶可收
功若治以寒涼必至敗而傷生矣

一儒者口乾發熱小便頻濁大便秘結盜汗夢遺
遂致廢寢用當歸六黃湯二劑盜汗頓止用六味
地黃丸二便調和用十全大補湯及前丸兼服月
餘諸症悉愈

韓用之年四十有六時仲夏色慾過度煩熱作渴
飲水不絕小便淋瀝大便閉結唾痰如湧面目俱

赤滿舌生刺兩唇燥裂遍身發熱或時如芒刺而無定處兩足心如烙以冰折之作痛脈洪而無倫此腎陰虛陽無所附而發於外非火也蓋大熱而甚寒之不寒是無水也當竣補其陰遂以加減八味丸料一斤內肉桂一兩以水頓煎六碗冰冷與飲半晌已用大半睡覺而食溫粥一碗復睡至晚乃以前藥溫飲一碗乃睡至晚食熱粥二碗諸症悉退翌日畏寒足冷至膝諸症仍至或以爲傷寒余曰非也大寒而甚熱之不熱是無火也陽氣亦

虛矣急以八味丸一劑服之稍緩四劑諸症稍退
大便至十三日不通以猪胆導之諸症復作急用
十全大補湯數劑方應

峻補其陰而用肉桂熱藥者以此引地黃等
藥歸腎所謂寒因熱用也熱症甫退寒症忽
來卽轉用桂附病固異醫亦竒俟陰陽稍平
卽以十全大補湯兼補收功可爲醫之至

陳舉人色慾過度丁酉孟冬發熱無時飲水不絕
遺精不止小便淋瀝或用四物芩連之類煎症益

甚更加痰涎上湧口舌生瘡服二陳黃柏知母之類胸膈不利飲食少思更加枳殼香附肚腹作脹大便不實脈浮大按之微細余朝用四君子爲主以熟地當歸夕用加減八味丸更以附子唾津調搽湧泉穴漸愈後用十全大補湯其大便不通小便作脹此直腸乾澀令豬膽通之形體殊倦瘦熱頗增急用獨參湯而安再用前藥而愈但勞發熱無時其脈浮洪余謂其當慎起居否則難治彼以予言爲迂至乙巳夏復作乃服四物黃柏知母而

歿

吳江沈察頓首僕年二十有六所稟虛弱兼之勞
心癸巳春發熱吐痰甲午冬爲甚其熱時起於小
腹吐痰而無定時治者謂脾經濕痰鬱火用芩連
枳實二陳或專主心火用三黃丸之類至乙未冬
其熱多起足心亦無定時吐痰不絕或遍身如芒
刺然治者又以爲陰火生痰用四物二陳黃柏知
母之類俱無驗丙申夏痰熱愈甚盜汗作濁果屬
痰火耶陰虛耶乞高明裁示余曰此症乃腎經虧

損火不歸經當壯水之主以鎮陽光乃就診於予
果尺脈洪大餘却虛浮遂用補中益氣及六味地
黃而愈後不守禁其脈復作余謂火令可憂當慎
調攝會試且緩但彼忽畧至戊戌夏果歿於都

勞卽發熱無時此氣血俱虛之症予少年亦
如此賴服藥不悞加意調攝幸有今日又熱
起小腹熱起足間余亦曾患此余向覽方書
有云熱起足心直上腹內乃陰氣虛極謂之
火起九泉之下十不救一又聞賀立菴曾云

某司理患此竟不起余少時劇病左腎不時覺熱至廿六歲之春忽然熱發於足雖不至每次起自足心衝入腹內然或發於足面或發於足心或發於腿下游移往來不定大槩是此症類一候不勝憂惶百計治之攷方書治法皆用四物黃柏之藥予遵先生教不敢妄試反以溫補得痊蓋腎熱足熱其爲陰虛水少不待智者知之但治以寒涼熱未必去而脾胃先敗多致傷生惟用補腎養血之藥

而以暖藥引經則以火伏火其火自平此卽
龍火井火見水反熾見火則滅之義乎予此
病十年方愈熱起小腹亦時有之幸確信堅
守並無求速效之心如法調治與病兩忘畢
竟久而奏效要知方書亦未可盡信余爲此
方書數年枉費許多憂鬱幾於病上添病凡
抱病者切不須憂鬱只要調治無差確守而
久服之俟之歲時雖有此惡候亦未必遂隕
厥命也此予親患親試者特書此以告後人

先生治沈孝廉以益氣湯六味丸予曾如此服不效不若加減八味丸得力以有肉桂五味故也以附子末唾津塗足心乃引火下行之義熱起足心衝腹亦用此法

△脾胃虧損吞酸噯腐等症

王大司馬嘔吐宿滯臍腹痛甚手足俱冷脈微細用附子理中丸一服益甚脈浮大按之而細用參附湯一劑頓愈

趙吏部患吐不止吐出皆酸味氣口脈大於人迎

二三倍速余投劑予曰此食鬱上宜吐不須用藥
乃候其吐清水無酸氣寸脈漸減尺脈漸復翌早
吐止至午脈俱平復勿藥自安後撫陝右過蘇顧
訪傾蓋清談厚過於昔且念余在林下頻以言慰
之

吐酸吞酸大畧不同吐酸者濕中生熱吞酸者虛
熱內鬱皆屬脾胃虛寒中傳末症故內經以爲火
者指其病形而言也東垣以爲胃寒者指其病本
而言也凡患此者先當辨其吞吐而治以固本原

爲主若復寒涼以傷胃氣則實實虛虛者矣復審其脾氣虛而飲食不能輸化濁氣不能下降者須用六君子湯補養脾胃爲主少佐越鞠丸以清中故東垣先生云邪熱不殺穀若誤認爲實熱而妄用寒涼必變敗症。

一儒者面色痿黃胸膈不利吞酸噯腐恪服理氣化痰之藥大便不實食少體倦此脾胃虛寒用六君加炮姜木香漸愈更兼用四神丸而元氣復此症若中氣虛弱者用人參理中湯或補中益氣加

醫宗秘傳 卷二
木香乾薑不應送左金丸或越鞠丸若中氣虛寒
必加附子或附子理中湯無有不愈

一上舍飲食失宜胸腹膨脹噯氣吞酸以自知醫
用二陳枳實黃連蒼朮黃柏之類前症益甚更加
足指腫痛指縫出水予用補中益氣加茯苓半夏
治之而愈腿足浮腫或焮腫寒熱嘔吐亦用前藥
此君症候想輕故止用平劑而不及薑附
胡濟之場屋不利胸膈膨悶飲食無味服枳朮丸
不時作嘔用二陳黃連枳實痰湧氣促加紫蘇枳